

- सर्वोच्च न्यायालय कोविड-19 टीका रे कारण खून रा थक्का जमण जस्या कूप्रभावां रो आरोप लगावण वाळी अर्जी ने खारिज कर दिया।
- राज्यपाल हरिभाऊ बागडे ने कह्यो —नारी सशक्तीकरण सारू काम करण वाळा समाज ई तेजी ऊं विकास कानी आगे बढे है।
- मुख्यमंत्री री सदरत मांय 'राजस्थान इकोनॉमिक रिवाइवल टास्क फोर्स' बणायी ज्यी।
- प्रदेश मांय कुछ ठौड़ां हल्की बिरखा-सियाळू फसलां री बिजायी रो दौर सरू।

000

सर्वोच्च न्यायालय आज कोविड-19 टीका रे कारण खून रा थक्का जमण जस्या कूप्रभावा रा आरोप लगावण वाळी अर्जी ने खारिज कर दिया है। मुख्य न्यायाधीश डी.वाई. चंद्रचूड़, न्यायमूर्ति जे.बी. पारदीवाला अर न्यायमूर्ति मनोज मिश्रा री पीठ कह्यो के जनहित अर्जी फगत सनसनी फैलावण सारू पेश करी ज्यी ही। एक दूजा मामलां मांय सुप्रीम कोर्ट एक गैर सरकारी संगठन री अर्जी ने खारिज कर दिया जिण मांय केन्द्र सरकार ने दूरदर्शन माथे 24 घंटा रो सिंधी भाषा रो चैनल सरू करण रा हुकम देवण री मांग करी ज्यी ही। इण ऊं पैला ई एन.जी.ओ. री ई अर्जी ने दिल्ली उच्च न्यायालय ई खारिज कर दिया हा।

000

देश री थोक मुद्रास्फीति अगस्त 2024 रा एक दशमलव 31 फीसदी ऊं बध ने सितंबर मांय एक दशमलव 84 फीसदी व्हे ग्यी है। वाणिज्य अर उद्योग मंत्रालय कानी ऊं आज काड़ी ज्या आंकड़ा मुजब मुद्रास्फीति मांय बढवार खावण री चीजां री कीमतां मांय व्ही बधोतरी रे कारण व्ही है। अगस्त मीना मांय खावण री चीजां री कीमता री मुद्रास्फीति तीन दशमलव 11 फीसदी ही जो सितंबर मीना मांय बध ने 11 दशमलव 53 फीसदी व्हे ग्यी है।

000

उपभोक्ता मामलां रा मंत्री कह्यो है के लारला दस साला मांय भारतीय मानक ब्यौरो बीआईएस कानी ऊं कोई 732 उत्पादा सारू ढोढ़ सौ ऊं बत्ती गुणवत्ता नियंत्रण आदेश काड़ी ज्या है। आज नुवी दिल्ली मांय विश्व मानक दिवस कार्यक्रम रे मौके वणा कह्यो के राष्ट्रीय मानकां ने लागू करण ने सरकार ठांवी प्राथमिकता दी है।

000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास कड़ी चलायी जा रही है। आज आप ने केन्द्र सरकार रा पैला 100 दिन मांय एमएसएमई हलका मांय करी ज्या कामां ऊं जाणकारी देवा

000

राज्यपाल हरिभाऊ बागडे कह्यो है के नारी सशक्तीकरण सारू काम करण वाळां समाज ई तेजी ऊं विकास कानी आगे बढे है। श्री बागडे आज जयपुर मांय 'महिला सुरक्षा मंच' कानी ऊं व्ह्या 'नारी शक्ति 2024' पुरस्कार जळसा मांय बोल रह्या हा। वणा कह्यो के टाबरा ने संस्कार हर हिम्मत नारी शक्ति रा रूप मांय माँ ई देवे है। वणा मातृ शक्ति ने टाबरां रा बौद्धिक बूता मांय बढावार करण वाळी बतावता कह्यो के महिलावां ने मन ऊं मजबूत व्हेणो चाहिजे। श्री बागडे पर्यावरण संरक्षण, उद्यमिता, शिक्षा, चिकित्सा, अर्थव्यवस्था जस्या न्यारा-न्यारा हलकां मांय ठावो काम करण वाळी महिलावां ने 'नारी शक्ति 2024' ईनाम देवता वां रा कामां ऊं सीख लेवण री अरज करी। वणा समाज मांय महिला शिक्षा अर वां ने मौके देवण सारू सगळा थर माथे काम करण माथे जोर दियो।

000

मुख्यमंत्री भजन लाल शर्मा री सदरत मांय 'राजस्थान इकोनॉमिक रिवाइवल टास्क फोर्स' बणायी ज्यी है। राज्य सरकार कानी ऊं ई बारा मांय हुकम काड़ दीरीज्या है। उप मुख्यमंत्री दीया कुमारी ई टास्क फोर्स री उपाध्यक्ष व्हेला। जद के उप मुख्यमंत्री प्रेमचन्द्र बैरवा रे अलावा उद्योग, ऊर्जा अर कृषि मंत्री अर मुख्य सचिव समेत दूजा अहलकार इण रा सदस्य बणायी ज्या है। प्रशासनिक सुधार मेहकमां रा उप सचिव

अशोक कुमार शर्मा बतायो के टास्क फोर्स मांय 5 विषय विशेषज्ञां ने सदस्य रा रूप मांय नामित कर्या जा सकेला। बणा बतायो के टास्क फोर्स कानी ऊं खास आर्थिक हलका री पिछाण, नीति निर्माण अर कार्यान्वयन, कौशल विकास अर शिक्षा, बुनियादी ढांचां रो विकास अर रोजगार समेत दूजा मुद्दा रा बारा मांय सिफारिश करी जायेला।

000

भारतीय रिजर्व बैंक रा गवर्नर शक्तिकांत दास कह्यो है के भारत विश्व थर री डिजिटल सार्वजनिक अवसंरचना विकसित कर चुक्यो है। ई अवसंरचना ऊं उच्च गुणवत्ता रा डिजिटल वित्तीय उत्पादां रा विकास मांय सुविधा मिली है।
वणा कह्यो के देश अबे दुनिया री तीजी महताऊ जीवन्त स्टार्टअप पारिस्थितिकी तंत्र रो केंद्र बण ग्यो है। अठे एक लाख चालीस हजार ऊं बत्ती स्टार्टअप अर एक सौ ऊं बत्ती यूनिकॉर्न है। आज नुवी दिल्ली मांय आर.बी.आई. एट नाईन्टी उच्च थर रा सम्मेलन मांय बोलता श्री दास आ बात कही। वणा बैंकां अर दूजां रोकण संस्थानां ने आं जोखिमां ऊं निपटण सारू वाजिब निपटारा उपाय करण ने कह्यो। श्री दास बधता कर्ज माथे ई चिन्ता जतायी है।

000

कोटा मांय 131 वां राष्ट्रीय दशहरा मेळा मांय अबे सांस्कृतिक कार्यक्रमों रो दौर सुरू व्हे ग्यो है। आखा प्रदेश मांय नामी कोटा दशहरा मेळा रो उद्घाटन 3 अक्टूबर ने व्ह्यो हो।

000

प्रदेश मांय आज कुछ ठोड़ा हल्की बिरखा व्ही। झालावाड़ मांय काले अर आज व्ही बिरखा ऊं खरीफ री कटी फसलां मांय नुकसान व्ह्यो है। जिला रा खानपुर उपखण्ड हलका मांय काले रात व्ही बिरखा ऊं धान ई फसलां ने नुकसान व्ह्यो है। जयपुर, सवाईमाधोपुर, दौसा समेत केई जिलां मांय बादल छाया ज्यो रह्या। कोटा अर जोधपुर संभाग रा कुछ जिला मांय आज हल्की बिरखा होवण रा समचार है। लारला 24 घंटा मांय अगूणी जिला मांय कठे-कठे ई हल्का ऊं मझला दर्जा री बिरखा दर्ज करी ज्यो। सब ऊं बत्ती 47 मिलीमीटर बिरखा चित्तौड़गढ़ रा डूंगला मांय मापी ज्यो। मौसम केन्द्र जयपुर काले उदयपुर अर कोटा संभाग रा जिला मांय कठे-कठे ई हल्की बारिश री आस जतायी है।

000

प्रदेश मांय सियालू साखा री बिजायी रो काम सुरू व्हे ग्यो है। अगूणी राजस्थान रा भरतपुर मांय मौसम बदलण रे साथै ई काश्तकार खेती रा कामा मांय जुट ग्या है।

000

डीग जिला मांय ई सियालू फसलां री बिजायी सुरू व्हे ग्यो है। खेती मेहकमां कानी ऊं डी.ए.पी. खाद री काळाबाजारी ने रोकण सारू खाद बीज रा गोदामां माथे बरोबर छापेमारी करी जाय री है। कृषि मेहकमां रा उपनिदेशक डॉ धर्मपाल सिंह बतायो के डी.ए.पी. री कमी रे चालता काश्तकारां ने गोष्ठियां री मार्फत सिंगल सुपर फास्फेट काम मांय लेवण सारू प्रेरित कर्या जावे।

000

खाद्य सुरक्षा योजना रे तैत पात्र लाभार्थियां ने 30 नवम्बर तांई ई-केवाईसी करावणो जरूरी है। बालोतरा रा जिला रसद अहलकार बतायो के बालोतरा अर बाड़मेर जिला मांय 82 फीसदी पिरवारां आप री के.वाई.सी करवा ली है। फेरू ई 18 फीसदी पिरवार अजै ई के.वाई.सी. नी करवा सक्या है। वणा बतायो के के.वाई.सी. नी करावण वाळां पिरवारां रा नाम खाद्य सुरक्षा योजना ऊं हटा दिया जायेला।

000

आवता तिवांरी सीजन ने देखता संचौर मांय जिला कलेक्टर शक्ति सिंह राठौड़ रा निर्देश माथे जिला खाद्य सुरक्षा अर केंद्र री भेळी टीम शुद्ध आहार मिलावट पर वार अभियान रे तैत ग्राम माखुपुरा रा निजी दूध डेयरी ने देख्या। ई दौरान मिलावट रा शक मांय कोल्ड स्टोरेज मांय भेळा 300 किलो दूषित पनीर ने जब्त कर ने मौका माथे ई नष्ट करी ज्यो। जब्त करी ज्यो खावण री चीजां रा नमूना जांच सारू जोधपुर री लैब मांय भिजवायी ज्यो है।

000

प्रधानमंत्री नरेन्द्र मोदी 27 अक्टूबर ने आकाशवाणी रा 'मन की बात' कार्यक्रम मांय आप रा विचार साझा करेला। आं ई मासिक रेडियो कार्यक्रम री 115 वी कड़ी व्हेला। सुणण वाळां ई मीना री 25 तारीख तांई टोल फ्री नम्बर 1 8 0 0 – 1 1 – 7 8 0 0 माथे कार्यक्रम रे सारु सुझाव भेज सके है। इण रे अलावा 1922 माथे मिस्ड कॉल दे र एस.एम.एस. माथे मिल्या लिंक माथे ई सुझाव भेज्या जा सके है। नरेंद्र मोदी एप अर माई जीओवी ओपन फोरम री मार्फत ऑनलाइन ई सुझाव दिया जा सके है।

000

पाली रा राजकीय बांगड़ कॉलेज मांय आज चिकित्सा अर स्वास्थ्य मेहकमां कानी ऊं मुक्त युवा अभियान 2.0 री मार्फत नौजवानां ने तम्बाकु उत्पादां ऊं होवण वाळा कूप्रभावा रा बारा मांय जागरूक करी ज्या। अभियान रे दौरान पढेसरा ने शपथ दीरायी ज्यी अर पम्पलेट्स बाटी ज्या।

000

भारत, काले ऊं नुवी दिल्ली रा भारत मंडपम मांय अंतर्राष्ट्रीय दूरसंचार संघ री विश्व दूरसंचार मानकीकरण सभा-डब्ल्यू.टी.एस.ए. री मेजबानी करेला। प्रधानमंत्री नरेन्द्र मोदी ई कार्यक्रम रो उद्घाटन करेला। भारत पैली बार इण री मेजबानी करे। श्री मोदी, इंडिया मोबाइल कांग्रेस रो ई उद्घाटन करेला।

00000